

Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Inatsisartut inatsisaat nr. xx, xx. xxxx 2014-imeersoq (Kommunini annaassiniarnissamut upalungaarsimasut il.il. ulorianartorsiorfiusut tunngavigalugit annertussusilerneqarnerinik atulersitsineq)

§ 1

Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaanni nr. 14-imi, 26. maj 2010-meersumi, Inatsisartut inatsisaatigut nr. 14-ikkut, 3. december 2012-imeersukkut allannguuteqartinneqartumi imatut allannguisoqassaaq:

1. § 1 imatut oqaasertalerneqassaaq:

”§ 1. Kommunit annaassiniarnissamut upalungaarsimasuutitanik pilersitsissapput, ajutoornerni ajunaarnersuarnilu, tassungalu ilanngullugu sorsuttoqarnerani najukkani ulorianartorsiornermut naleqquttumik inuit, pigisat avatangiisillu ajoqusernissaannik pitsaaliuisussanik, killilersimaarinnittunik ikiorsiisartunillu. Annaassiniarnissamut upalungaarsimasuutitat suliassat oqartussanit allanit isumagineqartussat suliassarinnigilaat.

Imm. 2. Kommunit annaassiniarnissamut upalungaarsimasuutitai najukkani ulorianartorsiorfiusinnaasunik, kommunimi upalungaarsimasut annertussusilerneqarnissaannut tunngaviliisussanik suussusersiniassapput misissueqqissaassallutillu (ulorianartorsiorfiusinnaasunut najoqqutassiat).

Imm. 3. Kommunalbestyrelsip imm. 2 naapertorlugu ulorianartorsiorfiusinnaasunut najoqqutassiat tunngavigalugit kommunimi annaassiniarnissamut upalungaarsimasut annertussusissaat aalajangersassavaat.

Imm. 4. Kommunalbestyrelsip imm. 2-3 naapertorlugit ulorianartorsiorfiusinnaasunut najoqqutassiat tunngavigalugit annaassiniarnissamut upalungaarsimasut aaqqissuussaanerat, sulinerat, annertussusilerneqarnerat atortussaallu aalajangersassavai.

Imm. 5. Imm. 2-4 naapertorlugit kommunip ulorianartorsiorfiusinnaasunut najoqqutassiai, kiisalu upalungaarsimasut kiffartuussineranni qaffasissuseq, aaqqissuussaanerat, sulinerat, annertussusilerneqarnerat atortussaallu kommunit annaassiniarnissamut upalungaarsimasuutitaannut pilersaarummi, § 21 naapertorlugu kommunip upalungaarsimanermut pilersaarutaanut tamarmiusumut ilaatinneqartumi nassuiarneqassapput.”

2. § 2 imatut oqaasertalerneqassaaq:

”§ 2. Naalakkersuisut nuna upalungaarsimaffimmut ataatsimut arlalinnulluunniit agguarsinnaavaat.

Imm. 2. Naalakkersuisut annaassiniarnissamut upalungaarsimasut nakkutigissavaat, tamannalu pillugu ersarinnerusunik maleruagassiorsinnaallutik, taakkunungalugu annaassiniarnissamut upalungaarsimasunut misiliilluni kalerrisaarisarneq ilaavoq.”

3. § 4, imm. 1 imatut oqaasertalerneqassaaq:

”Upalungaarsimanermut Ataatsimiititaliaq 7-inik ilaasorta qarpoq, kiisalu aalajangiisinnaanatik peqataasussat arlallit suleqataallutik, tak. imm. 2.”

4. § 4-mi imm. 1-ip kingorna nutaatut ikkunneqassaaq:

”*Imm. 2.* Ilaasortat marluk Naalackersuisunit toqqarneqassapput, kiisalu KANUKOKA, Nakorsaq Peqqinnissakkut Nakkutilliisoq, Issittumi Sakkutooqarfik aamma Kalaallit Nunaanni Rigsombudsmandi tamarmik immikkut ilaasortassamik ataatsimik toqqaassapput. Avatangiisinut, peqqissutsimut, attaveqarnermut aatsitassarsiornermullu naalackersuinikkut akisussaasut tamarmik immikkut ataatsimik aalajangiisinnaanani peqataatinneqartussamik toqqaassapput. Upalungaarsimanermut Ataatsimiititaliaq sulianut pisunulluunniit aalajangersimasunut suliassalersunut atatillugu upalungaarsimanermut ataatsimiititaliami aalajangiisinnaanani peqataatitassanik toqqaasinnaavoq.”

Imm. 2-3 matuma kingorna *imm. 3-4-nngorpoq.*

5. § 7 imatut oqaasertalerneqassaaq:

”§ 7. Kommunalbestyrelsi kommunimi annaassiniarnissamut upalungaarsimasuni sulisussanik atorfinitsitsissaaq.

Imm. 2. Upalungaarsimanermi pisortaq, ilinniartitaanikkut immikkut ittunik piginnaaneqarnini tunngavigalugu annaassiniarnissamut upalungaarsimasut ulluinnarni aquneqarnerinik isumaginnittussaq aammalu § 1, imm. 2 naapertorlugu najukkani ulorianartorsiorfiusunik misissueqqissaarnermik suliaqartussaq kommunalbestyrelsip atorfinitsissavaa.

Imm. 3. Upalungaarsimanermut pisortaq piffissaq tamakkerlugu atorfeqartinneqassaaq.

Imm. 4. Upalungaarsimanermut pisortap saniatigut suliniuteqarnermut aqutsisut aalajangersimasunik amerlassusillit kommunalbestyrelsip atorfinitsissavai. Suliniuteqarnermut aqutsisut ilinniartitaanikkut upalungaarsimanermut pisortap piginnaanerisa assinginik sapinngisamik piginnaaneqassapput. Suliniuteqarnermut aqutsisut amerlassusissaat annaassiniarnissamut upalungaarsimasut annertussusissaannik aalajangersaanermut atatillugu kommunalbestyrelsimiit aalajangerneqassapput.”

6. § 10, imm. 1 imatut oqaasertalerneqassaaq:

”Annaassiniarnissamut upalungaarsimasut ajutoornermik ajunaarnersuarmilluunniit imaluunniit sorsunnernik pisoqartillugu, kiisalu nunami akuutissanik ulorianartunik tassangaannartumik ajutoortoqartillugu ikuallattoornissamut, inuit, pigisat avatangiisillu ajoqusernissaannut najukkani ulorianartorsiorfiusinnaasunik naleqquttumik isumannaatsumillu suliniuteqassapput. Annaassiniarnissamut upalungaarsimasut aamma qimarngussat navialisullu allat tigooqqarneqarnerini, inissikkallarneqarnerini isumassorneqarnerinilu isumaginninnermi oqartussaasunut ikiuutissapput.”

7. § 10, imm. 3 imatut oqaasertalerneqassaaq:

”Imm. 3. Naalakkersuisut, kommuni alla, Angallannermut Aqutsisoqarfik, Issittumi Sakkutooqarfik imaluunniit politiit tamatuminnaga kissaateqarpata, ajutoortoqarnera, ajunaarnersuaqartoqarnera sorsuttoqarneraluunniit pissutigalugu annaassiniarnissamat upalungaarsimasut pisariaqartinneqartumik ikiuutissapput.”

8. § 21, imm. 3-p kingorna nutaatut ikkunneqassaaq:

”Imm. 4. Imm. 3 naapertorlugu pilersaarut Naalakkersuisunit akuerineqareerpat, kommunalbestyrelsip pilersaarut tamanut ammasumik pissarsiarineqarsinnaalersissavaa.”

Tamatuma kingorna *imm. 4 imm. 5-inngussaaq.*

§ 2

Imm. 1. Inatsisartut inatsisaat manna 1. januar 2015-imi atuutilerpoq.

Imm. 2. Inatsisartut inatsisaata matuma atuutilerneranut peqatigitillugu nalinginnaasumik ikiuiartortarneq atorfinnullu inuttalersuisarneq pillugu kaajallaasitaq nr. 1, 15. marts 1994-imeersoq atorunnaarsinneqarpoq.

Namminersorlutik Oqartussat, ulloq

Aleqa Hammond